



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

42. Kalenderwoche – ab 12. Oktober 2008

TV sehen büdelt: Historische Einblicke in die Einschaltquoten und sich daraus entwickelnde Millionen-Chancen...

Schangse fiehr misch

Hamm Sie das ooch schon gemärgd - de Unnorhaldungskunsd dud sisch schdarg endwiggn! Se dud so langsam off das Nihwoh vom Middlaldor zuriggkährn! Ooch im Fernsähor!

Nemmse bloß ma die Dorgschohs bei RDL am Nachmiddach - geschneidische Beschimbfung dor ibelsdn Ard! Sowas had damals off jedem middlaldorlischn Margd de Leide erheidord. Odor de Zur-Schauschdellung von geisdisch Behindorde odor körborlich Vorschdimmelde un Zwärge un so. Das hads ooch schon im Middlaldor gegähm. Wobei die dazumals in Gäfische warn un nisch im Fernsähor. Es dun eischendlich im Fernsähor bloß noch öffendliche Hinrischdungen fähln. Vorbrenn, offhäng, fedorn, deehn odor das, wose de Leide offs Rad geflochdn hamm...

Wobei, bei die Schohs... so Deudschland suchd die Subordohle und so... da wern de Gandidadn, die nisch grade de Besdn sinn, eischendlich ooch hingerischded. Wenn de Jühri mid Diedor Bohlen an dor Schbidze zugeschlachn had, dud da keenor widdor offschdehn un sing! Rums - Gobb ab!

Nee, abor de Zur-Schauschdellung von behindorde Leide had middlorweile e Mass angenomm, das dud das Middlaldor in Schaddn schdelln. Nemmse bloß ma dähn Dirg Bach, der digge runde Kuchlblidz. So habsch mir immor Rumbldilzschn vorgeschdelld. Odor de Hella von Sinnen - die ja so eene Ard Mischwähsn is - halb so eene Amazohne...

also, so eene vom Amazo hnas, un halb Badd Schbenzor! Die kannsde ooch nodfalls als Feuormeldor vorwendn. So schrill wie die, is keene Sirehne! Beeindruggn dud misch ooch immor dähr Gwahsdorf, dähr Obor sing dud, dähr dursch Gondorgahn so vorunschdalded is. Keen Obornsängor siehsde so ofd im Fernsähor wie dähn. Heeschdens nu jedzde in ledzdor Zeid noch dor Bohl Bodds! Das is ja ooch so Wundorgnabe där sisch vom hässlischn Endschn... odor vom hässlischn Ährbl!... zu eim Drällorbrinz gemausord had. Nee, so eenor... dähr ooch jedzd noch nach nischd aussähn dud, so eenor gibbd ja viel Hoffnung fiehr alle, die ooch dadervon dräum dun, bledzlish un unerwarded beriehmd zu wern.

Eene große Sensadsjohn is ooch immor, wenn dähr Undode offdrähnd dud, dähr nisch schdärm kann. Dähr... na, wie heeßd dähr gleich? Ja, Heeßdors heeßdor! Der is werglish sähr scheen gruslich. Odor dähr Buddingdambfor aus Marzahn - de Sindy! Eene absolutde Endgleisung von Weiblichkeid un Indelligenz in Rischdung Blabbormonsdor. Wennsde off Fraun keen Bogg mähr hasd, kannsde Dir bei dähr de ewische Abschdinez holn. Das männliche Geschnschdigg zu dähr is dann dähr Maddin - dähr mid dähm Maul, wie eene Ohfndiehre. Bloß das ehm kee Feuor drinne is. Die beedn hamm jednfalls een Hummohr, da fängd sogahr unsor Schdrubbi an zu jauln.

Nascha, mor kannse gahr nisch alle offzähl, die da so mid ihre Behindorungen Geld vordien dun. Ooch dähr Gurd Gröhmor odor dor Silboreisn odor... naja, je bleedor, um so mähr dun die gassiern! Meine Gudste had jedzde ma zu mir gesachd, se däde sisch wundorn, dass isch noch nisch Milljonähr gewordn bin. Isch hädde in dähr Rischdung eischendlish ooch große Schangsn!

Eduard Sachsenmeyer